



# ACEB

ARCHIV CULTURAL  
ENGIADINA BASSA

## Rapport annual 2016/17

### Società

In occasiun da la radunanza generala dals 7 avrigl 2016 s'ha dr. Domenic Scharplatz davò ses ons in uffizi retrat sco president dalla società Archiv cultural Engiadina Bassa. Domenic Scharplatz es stat president daspö la fundaziun dal ACEB dal 2010. El ha surtut quella jada la pretensiusa lezcha da metter in pè l'archiv cultural Engiadina Bassa. Grazcha a seis ingaschamaint instancabel vaina hoz ün archiv etabli e cuntshaint cun localitats ed üna infrastruttura adequata chi fin al di d'hoz ha ramassà ün grond nomer da documainta. Quista es registrada in fuorma da passa 7000 archivalias. Cun seis entusiassem e sia abiltà da motivar ha Domenic Scharplatz pisserà na be per localitats, sponsurs e novs commembers ma eir per personas chi's han ingaschadas e chi s'ingaschan adüna amo sco archivaras ed archivars, sco suprastants o sco personas chi ramassan documainta aint i'ls cumüns. Per tuot quai ch'el ha prestà pel bön da nossa società til saja ingrazchè amo üna jada da tuot cour! Sco arcugnuschentscha per seis merits ha la radunanza generala dals 7 avrigl 2016 nomnà a Domenic Scharplatz sco commember d'onur dal ACEB.

Il nomer da commembers dal ACEB s'amunta per la fin dal 2016 a 109 personas singulas, 32 famiglias o conjugals ed 8 personas giuridicas. Tanter quels sun 15 commembers chi sun entrats dal 2016.

### Suprastanza

La suprastanza s'ha eir quist on occupada da l'avegnir dal ACEB in regard a las localitats per l'archiv. Il cumün da Valsot vaiva nempe communicà fingià dal 2015 ch'el füess interessà da vender la chasa da scoula veglia a S-chadatsch. Perquai vaina scrit üna charta a la Regiun Engiadina Bassa/ Val Müstair e fat differentas dumandas. Tanter oter vaina dumandà scha la Regiun saja pronta da sustegner l'archiv eir in avegnir, saja quai idealmaing, finanzialmaing ed eir in mettand a disposiziun localitats per l'archiv. Il sustegn ans es gnü confirmà, in regard a localitats ans esa gnü fat attent cha no hajan ün contrat per la chasa a S-chadatsch cun ün temp da desditta da 12 mais e cun ün dret da precumpra. Schabain cha la resposta nun ans ha cuntantats dal tuot, faina quint cha la Regiun ans güdess a chattar otras localitats incas cha la chasa a S-chadatsch gniss vendüda. Intant vaina communicà al cumün da Valsot cha no stettan gugent inavant a S-chadatsch suot las cundiziuns dattas, ma cha no preferissan da nu cumprar il stabilimaint.



# ACEB

ARCHIV CULTURAL  
ENGIADINA BASSA

La suprastanza s'ha eir fat impissamaints, co chi's pudess render cuntschaint ed accessibel al public quella documainta veglia chi's rechatta aint i'ls archivs dals anteriurs cumüns d'Engiadina Bassa. Perquai vaina decis da contactar prosmamaing las persunas responsablas per eruir schi füss giavüschè da registrar quista documainta aint il program electronic dal ACEB o dafatta da tilla surtour in nos archiv.

Ün ulteriur proget es stat d'actualisar nossa pagina d'internet. Peder Rauch ha pisserà insembel cun Michael Walter per üna pagina nouva e moderna ed impustüt actuala. Ella cuntegna dasper infuormaziuns davart l'archiv eir documaints sco rapports e quints annuals, statüts, invids etc. Il böt es cha commembers ed interessats chattan in avegnir tuot l'infuormaziun davart l'ACEB ed eir cha la suprastanza haja in avegnir da trametter damain palperi culla posta.

## **Lavur dal archiv**

Ils archivars Clà Rauch, Cristian Juon, Armon Parolini, Peder Rauch e Jon Duri Tratschin han praistà l'on passà in tuot 661 uras da lavur. La nouva versiun dal program per registrar ans ha chaschunà qualche rumpatesta ma es uossa in funcziun. Documainta per registrar vaina survgni da bleras varts. Manzunada saja be la donaziun da Not Vital chi'ns ha surdat tuot la documainta davart la renovaziun dal chastè da Tarasp tras Karl August Lingner.

## **Activitats externas**

Sco üsità ha l'ACEB organisà eir dal 2016 occurrenzas publicas illa regiun. Il referat da dr. Paul Grimm dals 26 favrer a Scuol davart las trais persunalitats da Scuol, Jon Marnia, Jon Men Marchi e Martin Schlatter es stat manzunà fingià aint il rapport annual da l'on passà. Als 24 november ha tgnü dr. Paul Grimm ün referat a Ftan davart "Rosius à Porta e l'on da la fomina". La sala plaina sül Institut Otalpin ha muossà danövmaing il grand interess chi'd es avant man pro nossa populaziun per temas istorics locals, impustüt schi vegnan preschantats dad ün perit sco dr. Paul Grimm. Ad el saja ingrazchè da cour per esser adüna darcheu pront da spordscher tals referats. Pro quista occasiun vaina eir la pussibilità da preschantar e render cuntschaint nossa instituziun aint illa regiun.

Per finir lessa manzunar cha no vain pudü preschantar sün üna pagina nos archiv aint i'l rapport annual 2015 da l'Archiv Culturel Engiadin'Ota.

Tschlin, marz 2017

Jon Duri Tratschin, president ACEB